

Isorliunerusuni imigassanik kimittuuneq pisinissamut inerteqquteqarneq pillugu apeqquteqaat aallaavigalugu oqallinnissamik siunnersuut

(Inatsisartut Ilaasortaq Justus Hansen, Demokraatit)

Akissuteqaat

(Peqqissutsimut Naalakkersuisoq, Agathe Fontain)

Imigassanik kimittuunik 15 procent taannaluunniit sinnerlugu kimittussusilinnik nunatsinni isorliunerusut ilaanni nioqquteqarsinnaanerup sassaallersinnaanerullu inerteqqutaanerata pisisissamisoornera pillugu apeqquteqaat aallaavigalugu oqallinnissamik siunnersuut qujassutigaa.

Nunatsinni imeriaatsip ilisarnaataasa ilagaat aalakoorniaannarlutik imertartut amerlanerat. Imigassat aalakoornartullit pilertornerusumik aalakoortitsisarput taamaalillutillu pilertornerusumik imminut aqussinnaajunnaarnermik kinguneqartitsisarlutik. Alakoorniaannarluni imertarnerup toqusoqakulanerulernermik, kiisalu tassangaannartumik ajoqusersinnaanermik kinguneqartitsisarnera uppersarsilluugaavoq. Nakuuserarnerit, ajutoornerit, imminut toqunerit, kinguaassiuutitigut innarliisarnerit meeqqanillu sumiginnaasarnerit imigassamik atornerluinermut atapput, pingaartumik aalakoorniutigiinnarlugu imertarnermut.

Kitaani Tunumilu killilersuinermit pineqartumut tunngaviuvoq ajortunik arlalitsigut pisoqartarsimanerata malitsigisaanik inatsisitigut inerteqquteqarnissaq pillugu kommunalbestyrelsit qinnuteqarsimanerat. Tassunga atatillugu oqaatigineqassaaq, nunatsinni kommunini kommunalbestyrelsit namminneerlutik periarfissaqarmata najukkami tuniniaasinnaanermut sassaalliisinnaanermullu inerteqquteqarnissamut.

Inerteqquteqarnissap aalajangiunneqarneranut atatillugu Qaanaami Tunumilu kommunalbestyrelsit nassuerutigaaq imigassamik atornerluisoqarnera annertoorujussuarmik ajornartorsiutaasooq, taamalu imigassat kimittuut inerteqqutaalernissaat peqqissaarullugu isumagisimalugu. Killilersuinerit pineqartut kingunerannik persuttaasarnerit aserorterisarnerillu malunnaatilimmik ikileriarsimapput.

Inerteqquteqarneq sunniutinik katsorsaanerinnartut isigineqarsinnaavoq, tassa imigassartorpallaarnermit tunngaviatigut ajornartorsiutaasut pissutaasullu eqqissisimasumik isumagineqarniassammata. Imigassartortarnerup nassataanik pingaartumik meeqqanut tunngatillugu ajornartorsiutaasartut, politikkikkullu immikkut isigineqartut, kommunalbestyrelsinit isumagineqaaqqissinnaanngorpata, soorunami apeqqutip oqallisigeqqinneqarnissaanut tunngavissaqartoqalissaaq.

Inerteqquteqarnerup atorunnaarsinneqannginnerani Naalakkersuisut naatsorsuutigaaq imigassanik kimittuunik tuniniaaqittalernerup kingunerisinnaasaasa najukkani oqaluuserineqarnissaat, kiisalu ammaassinermut atatillugu ajornartorsiutaasinnaasutut naatsorsuutigineqartut

najukkami qanoq isumagineqartarnissaat pillugu pilersaarusiortoqarnissaa. Ammaassinissamik kommunit kissaateqarpata, aamma ammaanermut atatillugu ajornartorsiutaasinnaasunik isumaginninnissamut pilersaarusionsuppata, tamanna Naalackersuisunit ilalernartinneqarsinnaavoq.

Siunnersuuteqartup oqaatigaa, inuit imigassamik ajornartorsiuteqartut qanoq pitsaanerpaamik ikiorneqarsinnaanerisa sulissutigineqarnissaa pisariaqartoq, aamma meeqqat inuusuttullu peqqinnartumik imertariaaseqarnissamut qanoq pitsaanerpaamik perorsarneqarsinnaanerit sulissutigineqassasoq. Tamanna isumaqatigiinnarsinnaavara. Inerteqquteqarnerli tamatumunga illuatungiliunneqarsinnaanngilaq. Imigassat kimittuut inerteqqutaanerisa atorunnaarsinneqarneratigut imaanngilaq imigassamik ajornartorsiutillit ikiorserneqartut, imaluunniit meerrartatta inuusuttortattalu peqqinnartumik imertariaaseqalernissaannut ilinniartinneqarnissaat qulakkeerneqartoq.

Naalackersuisut isumaqarput inerteqquteqarneq nunatsinni assigiimmik pineqarnissamut attuumassuteqanngitsoq, najukkanili assigiinngissuteqarnermut attuumassuteqarnerulluinnartuq. Innuttaasut assigiimmik pineqarsinnaapput aatsaat assigiinngitsumik pineqarunik - tassa pisariaqartitaat kissaataallu aallaavigalugit. Tassunga atatillugu pingaaruteqarpoq meeqqat atugarisaasa aamma sumiginnaanertaqanngitsumik paarsinerlunnertaqanngitsumillu inuuneqarlutik pisariaqartitaasa aallaavigineqarnissaat. Angajoqqaat aalakoortik meeqqaminnik isumaginnissinnaasut meeqqat pisariaqartippaat. Imminut aperisoqarsinnaavoq inerteqqutip atorunnaarsinneqarneratigut meeqqat inersimasulluunniit pisariaqartitaat isumagineqassanersut. Imigassamik kimittuunik pinngitsuineq kialuunniit ajoqutiginaviannngilaa. Angajoqqaalli imigassamik atornerluinertik pissutigalugu meeqqaminnik isumaginnissinnaanngitsut meeqqanut ajoqusiisarput.

Tassungali atatillugu pingaaruteqarpoq erseqqissaatigissallugu inerteqquteqarnerit allatullu killilersuinerit kisimiitillugit atuutsinneqassanngimmata. Pitsaaliuilluni suliaqarnerit innuttaasut peqqissusaannik pitsaanerulersitsiniarluni suliniutinut tunngaviupput tunngaviujuassallutillu, suliaqarfimmilu tassani paasisitsiniaaneq pitsaaliuinerlu aqputigalugit ullumikkut annertuumik suliniuteqartoqareerpoq.

Innuttaasut peqqissuunissaannik suliniummi Inuuneritta-mi salliusut ilaattut imigassanut ikiaroorartunullu tunngasut taamaalillutik suliniuteqarfiupput. Sap. ak. 18 nunatsinni tamarmi ersaritsinniarneqarpoq imigassap ajoqusiisarneranut tunngasunik qaammarsaanikkut pisoqartitsinikkullu. Tassani assersuutigalugu najukkani pinaveersaatitsinerit ataatsimiititaliat pingaaruteqarput. Peqqissutsimut Naalackersuisoqarfik pinaveersaatitsinerup iluani arlalipparsuartigut aamma ingerlataqarpoq. Soorlu qaammarsaanermi atortussanik suliaqartoqarpoq, ilutigalugulu najugaqarfinni pinaveersaatitsinerit ataatsimiititalianut ikorfartuilunilu ilitersuisarpoq. Pinaveersaatitsinerit suliaqarnerup iluani qaammarsaasarnissat suliniutillu allat siunissami ingerlanneqartarnissaat kiisalu meeqqanut inuusuttunullu tuttussanik isiginnaagassianik qaammarsaasarnissat qularutissaanngilluinnarput.

Pitsaasumik pissarsiffiulluurtumillu oqallittoqarnissaa Naalackersuisut qilanaaraat.